



झञ्जलपा वाःपौ

JWOJALAPA NEPALBHASHA WEEKLY

दै: ६ ल्या: २६ पूर्णाङ्क: ७८

ने. सं. ११३६ पोहेलाथ्व अस्तमी आइतवा: २०७२ माघ ३ गते आइतवार (Jan- 17, 2016)

मू: ढ/- (च्यातका)

नेपा: राष्ट्रिय पार्टीइ भुखाय् ब्वल पार्टीयात पहिचानया पक्षय् यंकेगु मनोज नेवा: खड्गीया कुत:

ज्वज्वलपा वा:पौ /

नेवा:तयगु पार्टी धका: न्ह्या: वयाच्वंगु नेपा: राष्ट्रिय पार्टीइ लिपांगु इलय् वया भुखाय् ब्व:गु दु ।

विशेष याना पहिचान आधारय् नेवा: प्रदेश सहित संघीयताया नितिं पार्टी न्ह्या: वनेगु ला कि मवनेगु धइगु विषययात कया आन्तरिक ल्वापु भन भन तच्चया व:गु दु । जारी जूगु संविधानया पक्षय् च्वंगु नेपा: पार्टीया छम्ह जक सभासद् लक्ष्मण राजवंशी संविधानय् ल्हा:चिं तयादीगु ख: । अले पार्टीया अध्यक्ष डा. केशव मान शाक्यं नं जारी जूगु संविधान कथं न्हय्गु प्रदेश तसकं बांला: धका: धयादीगुलिं नेवा: पहिचानया आधारय् नेवा: प्रदेश सुनिश्चित जुइमा:गु खँ तयेवं पार्टी दुने भुखाय् ब्व:गु ख: । थुगु पार्टी आ: गुगु नं इलय् वैचारिक रुपं विवाद तच्चया वंगुलिं विभाजन जुइगु अवस्थाय् थ्यंगु दु धका: सूत्र धा:गु दु ।



न्हापांगु संविधानसभाया चुनाव व निक्क:गु संविधानसभा चुनावय् नं स्वनिग:या आदिवासी नेवा:तयगु पार्टी धका: चुनावय् ब्वतिका:गु पार्टी धइगु नेपा: राष्ट्रिय पार्टी ख: । उगु पार्टीयात नेवा:त जक मखु नेवा: मखुपिन्सं नं नेवा:तयगु हक अधिकारया नितिं पलिस्था या:गु पार्टी धका: तायेका वयाच्वंगु दु ।

नेपा: राष्ट्रिय पार्टीया युवा नेता मनोज नेवा: खड्गीं गुगु नं हालतय् नेपा: राष्ट्रिय पार्टीयात नेवा: प्रदेशया पक्षय् यंका: त्व:तेगु जुइ धका: धयादीगु दु । ज्वज्वलपा वा:पौलिस खँल्हासें वय्कलं नेपा: राष्ट्रिय पार्टी दुने वैचारिक रुपं लाइन संघर्ष जुयाच्वंगु खँयात स्वीकार यानादिल ।

नेपा: पार्टीया पोलितब्यूरो दुज: नापं राजनीतिक ब्यूरोया दुज: अले महानगर समितिया प्रमुख तकं जुयादीम्ह युवा नेता खड्गीं नेपा: राष्ट्रिय पार्टी गठन यानागु धइगु हे नेवा: पहिचानया आधारय् नेवा: प्रदेशया नितिं ख: धयादिसे आ: नेवा: प्रदेशया नितिं पार्टी दुने संघर्ष यायेगु जुइ धका: धयादिल ।

पार्टीयात नेवा: पहिचान व नेवा: प्रदेशया विपक्षय् यंकेगु कुत: यानाच्वंगु दु धयादिसे थ: नाप नापं यक्व हे युवा नेता नापं कार्यकर्तात थ्व इलय् नेपा: राष्ट्रिय पार्टीयात नेवा: पहिचान सहितया नेवा: प्रदेश प्राप्ति आन्दोलनया नेतृत्व याइगु पार्टीया रुपय् विकास याना यंकेमा: धइगु पक्ष दु धयादिसे उकिं आ: पार्टीयात नेवा: प्रदेशया पक्षय् गुगु नं हालतय् यंकेगु जुइ धका: धयादीगु दु ।

थुगु कथं युवा नेता मनोज नेवा: खड्गीं कनादीगु धइगु पार्टी दुने नेवा: प्रदेशया सवालयात कया नाप नापं न्हूगु संविधान जारी जूगुया विषययात कया समर्थन या:गु खँय् तसकं विवाद अप्चया वयाच्वंगु अले उकिं मूर्त रुप काइगु अवस्थाय् थ्यंगु ख: धका: धायेफइगु अवस्था दु ।

नेवा: प्रदेशय् जागरणपाखें
जुलुस वना ब्वति काइगु

नवाइ द्वादन्नय ग्रादिवासी

अनअनी अगबल गतिमान

नेवा: प्रदेशमा आदिवासी
जनजाती जागरण अभियान


ज्वज्वलपा वा:पौ

संविधानसभापाखें जारी या:गु न्हूगु संविधानय् नेवा: नापं आदिवासी जनजातिया अधिकार क्वपालात:गु अले भाषा, जातीनिसं हरेक ख्यलय् अधिकार मविउसे खस आर्ययात जक सर्वोच्चता कायम यानातल धका: जनतायात थुइकेगु ज्या याना वयाच्वंगु नेवा: प्रदेशय् आदिवासी जनजाति जागरण अभियानपाखें सोमवा: न्हिनय् ११ वजे असनं जुलुस पिकाइगु जूगु दु ।

नेवा: स्वायत्त राज्य मंका: संघर्ष समितिया ग्वसालय् बसन्तपुलिइ सोमवा: माघ ४ पोहेलाथ्व नव:मि खुन्हु जुइगु सभाय् ब्वति कायेगु नितिं नेवा: प्रदेशय् आदिवासी जनजाति जागरण अभियानपाखें अथे जुलुस पिकया वनेत्यंगु ख: ।

उगु जुलुसय् अभियानया थ:गु हे व्यानर ज्वना वनेगु धका: धा:गु दु । अथे हे नेवा: नापं आदिवासी जनजाति नं खुक्व:गु नेवा: एकता दिवसय् सहभागी जुइगु नाप नापं जागरण अभियानपाखें पिथंगु पर्चा इना वनेगु धका: धा:गु दु । अथे हे नेवा: देय् दबू नापं थीथी जातीय संगठन तकं उखुन्हु असनय् हे मुना नेवा: प्रदेशय् आदिवासी जनजाति जागरण अभियानया हे जुलुसय् सहभागी जुया वनेगु धका: धा:गु दु ।

आ:या अवस्थाय् नेवा: एकता दिवसयात नं आन्दोलनया रुपय् हनेमा: धका: व: विइगु कथं अथे जुलुस याना वनेत्यनागु ख: धका: नेवा: प्रदेशय् आदिवासी जनजाति जागरण अभियान धा:गु दु ।



किपूया गथु प्याखं (गं मखा:गु प्याखं)

सफू बजारय् पिदने धुंकूगु दु थ:गु प्रति सुरक्षित यानादिसं

सफू दइगु थाय्

- १) खपया च्याम्हसिंहया स्टेशनरी पस: (श्याम सुन्दरया पस:)
- २) खप कमल विनायकया स्टेशनरी पस:
- ३) किपूया सत:क्वया स्टेशनरी पस:
- ४) किपूया देय् पुगूया बाघभैरव स्टेशनरी पस:
- ५) किपूया पांगा दोवाटोया किपू बूक प्वाइट
- ६) यैया भोताहिति नातिबज्रया पस:
- ७) यैया कुलाभुलिइ च्वंगु मंका: धुकू पस:
- ८) यल, यल ध्वाखा अर्जुन स्टेशनरी पस:
- ९) स्वापू नितिं मेमेगु फोन नम्बर: ४३३४०९३, ९८४९७५२५८३, ९८४६०४६९२३९

मू

सच्छि तका जक (१००/-)



ज्ञाजलपा वा:पौ

सल्लाहकार

श्रीकृष्ण महर्जन

प्रकाशक:

नजरराम महर्जन

सम्पादक

श्रीकृष्ण तण्डुकार

ले-आउट:

ज्वजलपा डेस्कटप

संवाददाता

भरत महर्जन, निरजमान सिंह

थाकू

प्रिन्ट स्काई, यें

ज्याकू: निखासी त्वा: किपू नपा-३

फोन ल्या: ४३३३००७, ९८४९४०९०७७

ई-मेल : jwojalapaweb@gmail.com

सम्पादकिय

नेवा: एकता दिवस व नेवा: मुद्दा

लखौं नेवा:त दशरथ रंगशालाय् मुना जनस्तरं नेवा: एकता दिवस धका: हना वयाचंगु दिं धइगु पोहेलाथ्व नव:मि ख: । नेवा: स्वायत्त राज्य मंका: संघर्ष समिति पोहेलाथ्व नव:मि माघ ४ गते सोमवा: खुक्व:गु नेवा: एकता दिवस हनेत्यंगु दु । थुगुसीया दिवस धइगु आन्दोलन रुपय् हनेगु ख: धका: मंका: संघर्ष समिति धयाचंगु दु ।

न्हूगु संविधान जारी जुइ धुंका: औपचारिक रुपं छुं नं सार्वजनिक रुपं ज्याभूव: मया:गु मंका: संघर्ष समिति संघर्षया रुपय् हे नेवा: एकता दिवस हनेगु धका: घोषणा या:गुयात नेवा: प्रदेश पक्षधर तय्सं सकारात्मक रुपं का:गु दु । जारी जूगु संविधानय् भाषा, जाती जक मखु हरेक सवालय् तकं विभेद या:गु अले राज्यं वहिस्करणय् लाकात:गु समुदायया हक अधिकार क्वालेगु ज्या या:गुयात थुगुसी नेवा:तयगु मुद्दाया रुपय् नेवा: एकता दिवसय् स: तयेमा:गु आवश्यकता दु ।

नेवा: एकता दिवस धइगु परम्परायात निरन्तरता बिइगु अले नेवा: प्रदेश विरोधीतय् थनेगु दबूया रुपय् जुल धा:सा कन्हय् वना नेवा: स्वायत्त राज्य मंका: संघर्ष समिति याया नेतृत्वयात नेवा:तय्सं अभि नं विश्वास मयायेगु अवस्थ वइ अले आ: नेवा:तयगु मुद्दायात हे ल्हवनेगु नापं संघर्षया उद्घोष जुइगु कथंया एकता दिवस हनेमा:गु अवस्था व:गु दु ।



नेवा: स्वायत्त राज्य मंका: संघर्ष समिति खुक्व:गु नेवा: एकता दिवस त:जिक हनेगु नितिं धका: येंया त्वा:त्वालय् थुगु कथंया व्यानर तयेगु ज्या या:गु दु । न्हूगु संविधानय् भीगु असहमति क्यनेनु धइगु नारा बिया पोहेलाथ्व नव:मि माघ ४ गते सोमवा: न्हय् ११:३० ता इलय् येंया बसन्तपुलिइ त:जिक सभा यायेत्यंगु दु । उगु सभाय् थीथी नेतातय्सं न्ववानादी धका: ग्वसा:खलकं धा:गु दु । लखौं नेवा:त दशरथ रंगशालाय् मुना जनस्तरं नेवा: स्वायत्त राज्य घोषणा या:गु दिंयात लुमंका: दैय् दसं नेवा: स्वायत्त राज्य मंका: संघर्ष समिति नेवा: एकता दिवस हना वयाचंगु दु ।

येंनिसें किपूतक ज्यापू महागुथि-३

ने.सं.११२३ कछलाथ्व पारु म्हपुजा (वि.सं.२०५९ कार्तिकं ज्यापु महागुथि किपू नगर समिति पितंगु लुमन्ति-पौ पाखें ल्हय्या कया:गु । थ्व च्वसां ज्यापु महागुथि गथेजुया गुगु कथं पलिस्था जुल धइगु सिकेत तिव: बिइगु तायेका थन न्हय्यव्या च्वना । – सम्पादक



—बुद्धिलाल ज्यापू—

ज्यापु महागुथिया इनाप

१) फुक्क ज्यापु जातियात ज्यापु महागुथिया विधानकथं गुथ्या: जुया:दीत इनाप यायेगु ।

२) ज्यापु जाति सम्बन्धि थ:म्हं स्युगु खँ महागुथियात बिया: ज्यापु सम्बन्धि अनुसन्धान यायेत व थ्व ज्या ता:लाकेत फु कथं तिव: बिया:दीत इनाप यायेगु ।

३) ज्यापु जाति, धर्म, संस्कृति आदिया खँय् अनुसन्धानात्मक च्वसु च्वया: पत्र पत्रिकाय् पितना: दीत इनाप यायेगु ।

४) हिलावं वनाचंगु विश्व परिप्रेक्ष्य ल्वयक ज्यापु जाति बौद्धिक, आर्थिक, सामाजिक, राजनैतिक, शैक्षिक आदि क्षेत्रय् न्ह्याज्याकेत इनाप यायेगु ।

५) ज्यापु महागुथिया उद्देश्य व कार्यक्रम पूर्वकेत मा:गु सरसल्लाह व तिव: बिया:दीत इनाप यायेगु ।

ज्यापु महागुथि के.त.संया ग्वसालय् २०५१ आश्विन २६ गतेखुन्हु येंदया स्वीनिगु त्वा:या प्रतिनिधिपिं मुना: ज्यापु महागुथि काठमाडौं नगर तदर्थ समिति स्वनेगु ज्या जुल ।

ज्यापु महागुथि यें नगर तदर्थ समिति स्वनेगु ज्या जुइ धुंका: २०५१ मंसीर २८ गते खुन्हु पांगाया ज्ञानमाला न्ह्याइपु भजन खलकय् सार्वजनिक मुँज्या जुल । थुगु मुँज्यां दक्षिण भेग ज्यापु महागुथि तदर्थ समिति स्वन ।

थुगु समितिइ शुकराम महर्जनजुया: नाय:सुइ भिस्हेसिया पदाधिकारीपिं ल्य:गु ख: । लिपा मा:कथं पासापिं तनां यंके फेकथं अधिकार नं थुगु समितियात ब्यूगु ख: ।

२०५१ फागुण २० गते भाजु शुकराम महर्जनया सभापतित्वय् ज्यापु महागुथि दक्षिण पश्चिम भेगया संगठन निर्माण यायेगु खँय् सहलह जुल । थुगु मुँज्या सतुंग:या रामभक्त महर्जनजुया छें जूगु ख: । थुगु मुँज्याय् किपूया ज:ख:या गामय् भाजु शुकराम महर्जन, दान वहादुर महर्जन व नसिं महर्जन सक्रिय जुइगु क्वा:छित ।

२०५२ पौष १५ गते शनिवा:खुन्हु मंगल माध्यमिक विद्यालय किपुलिइ ज्यापु महागुथि निर्माण यायेगु भवलय् ज्यापु महागुथि व ज्यापु जातिया विषय केन्द्रित जुया: ज्यापु सेवा समाजनिसें

ज्यापु महागुथितकया सहलह जुल । थनं लिपा ता:ईतक मुनेगु ज्या दित ।

ज्यापु महागुथिया हरेक ज्या खँय् सुस्तता वया: धिसिलाक्क ज्या व खँ मज्जुलिं २०५५ श्रावण ३० गते ज्यापु महागुथि केन्द्रिय तदर्थ समिति न्ह्या: यायेगु ज्या जूगु ख: । थुगु समिति क्वय् बियाकथं दु ।

१) नाय: विपेन्द्र महर्जन, २) न्वकूर राजभाइ ज्यापु ३) विरसिंह महर्जन ४) प्रेममान डंगोल ५) मू छयाञ्जे राजभाइ जक:मि ६) छयाञ्जे अनुप सिंह सुवाल ७) दांभरिं कृष्ण महर्जन ८) दुज: न्हुच्छेलाल महर्जन, ९) मचाराजा महर्जन १०) सानुकाजि महर्जन ११) बुद्धिलाल ज्यापु १२) रत्नकाजि महर्जन १३) नविन डंगोल, १४) गोपाल महर्जन १५) कुष्ण कुमार प्रजापति १६) काजिमान महर्जन १७) हेराकाजि महर्जन, १८) बुद्धि महर्जन १९) तीर्थ महर्जन २०) जुजु काजि महर्जन २१) माणिक महर्जन

ज्यापु महागुथि जिल्ला प्रशासन कार्यालयय् २०५५ चैत्र २ गते आधिकारिक रुपं दर्ता जुल ।

ने.सं.१११७ न्हुँदं कौलागा ३० लक्ष्मीपूजाखुन्हु नेवा: सांस्कृतिक हनेज्याया नितिं थीथी खल: पुच:यात व्वनापौ व म्हासिका पौ बियेगु निर्णय यात । (दक्षिण पश्चिम लागा दुने पर म्परागत बाजंया संरक्षकत ज्यापुत जक मखुसे मेमेगु जातयापिं नं दुगुलिं ज्यापु गुरु, कजि व कतांगुलिपित जक हनेगु मयासे ज्यापु लगायत मेमेगु पर म्परागत बाजंया कजि, गुरु व कतांगुलिपित नं हनेगु कथं नेवा: सांस्कृतिक हनेज्या ग्वसा: खल: दयेकूगु ख:) थुगु नेवा: सांस्कृतिक ज्याभव: धिसिलाक्क हनेया नितिं थी थी संयोजकत ल्ययेगु ज्या जुल ।

प्रचार प्रसार संयोजक(राजभाई जक:मि ज्यापु, दक्षिण लागा व्यवस्थापन व आर्थिक संयोजक(कुलवहादुर महर्जन (पांगा (पांगा, जाखा, च्ववहा: व फापि) मध्य लागा व्यवस्थापन संयोजक(ज्ञानवहादुर महर्जन (किपू (किपू नगां, भाजंगा: व इताग्वल) पश्चिम लागा व्यवस्थापन संयोजक (मानदा महर्जन (बलम्बु (सिर्दीनसे थक्वा:तक), मञ्च व्यवस्थापनया नितिं काजिराम महर्जन(चिथू ब्वति का:गु खल:पुच:या नां मुनेज्या यायेत स्वम्ह ल्य:गु दु ।

१) जीवन महर्जन(पांगा, २) श्रीकृष्ण ज्यापु (किपू व ३) विविशा(किपू नेवा: सांस्कृतिक हनेज्याया नितिं प्रचार प्रसार भाव्य पत्रिका पितनेत, केपु यातायात, व्यवस्थापन व विविध याना मुक्कं ७०,०००/ तका खर्च मुनेगु खँ क्व:जित । प्रचार प्रसार सामाग्री

तयार यायेगु नितिं कुलवहादुर, जीवन, विविशा, त्रानवहादुर, राजभाइ जक:मि व श्रीकृष्णयात जिम्मा बिल ।

ने.सं.१११६ कौलागा सप्तमिखुन्हु लक्ष्मीदास महर्जनजुया अध्यक्षताय जूगु मूज्या व ने.सं.१११६ कौलागा द्वादसि खुन्हु टिकाराम महर्जनजुया अध्यक्षताय जूगु मसंज्या विशेष याना: नेवा: सांस्कृतिक हनेज्या दबुली यायेमा:गु खँय् केन्द्रित जुल सा ने.सं. १११६ कौलागा चतुर्दशीखुन्हु च्वंगु मुँज्याय् दबुली न्ववापिनिगु व्यवस्था यायेगु बारे केन्द्रित जुल ।

ज्यापु महागुथिया संगठन विस्तार यायेगु केन्द्रया तातुना कथं किपूली नगर पालिका जुसँलि न्हापा दयेका त:गु दक्षिण पश्चिम लागायात दक्षिण भेग जक स्वयेगु कथं किपू नगर लागादुने सिमित याना प्रत्येक नेवा: वस्ती थीचा थीचाहे मुँज्या यायेगु ता: तुंगु ख: । वहे कथं दकलय् न्हापां छ: ध्वाखाय् न्हापांगु मुँज्या जूगु ख: ।

न्हापांगु मुँज्या (च:ध्वाखा)

ने.सं.१११९ थिलाथ्व द्वितीया (२०५५ मंसीर ५ गते) शनिवारखुन्हु किशोर कुमार महर्जनया छेंय् ज्यापु महागुथि किपू नगर कमिटीया निर्माण व उकिया अवधारणाया खँय् सहलह ब्याकल । थुगु मुँज्याय् विशेष याना: किपूयापिं पासापिनिगु जक मुँज्या ख: ।

निक्व:गु मुँज्या (पांगा)

ने.सं.११२० पोहेलागा नवमि खुन्हु ज्यापु महागुथिया दक्षिण पश्चिम भेग तदर्थ कमिटीया अध्यक्ष सुकराम महर्जनजुया सभापतित्व पांगाया पवित्र कुति विहारय् मुँज्या जुल । थुगु मुँज्यां किपू नगर सम्मेलन ग्वसा: खल: गठन जुल ।

कुलवहादुर महर्जन (संयोजक, ज्ञानवहादुर महर्जन(उप संयोजक, जीवन महर्जन(सचिव, रत्नमान महर्जन(सह सचिव, महन्त बहादुर महर्जन(कोषाध्यक्ष, ज्ञानकुमार महर्जन(दुज:, देववहादुर महर्जन(दुज:, सुकराम महर्जनया संयोजकत्वय् टिकाराम महर्जन, बुद्धिलाल ज्यापु, शम्भुराम मान्छे व सानुभाइ महर्जन दुज: दुगु छगू सल्लाहकार समिति गठन जुल ।

थुगु हे मुँज्याय् कुलवहादुर महर्जन, ज्ञान वहादुर महर्जन, रत्नमान महर्जन, महन्तबहादुर महर्जन, जीवन कुमार महर्जन, देव वहादुर महर्जन व ज्ञान कुमार महर्जन दुगु सचिवालय गठन जुल ।

न्हापा दक्षिण पश्चिम भेग तदर्थ समितिपाखें ज्या जुयाचंगु कीर्तिपुर नगरपालिका दुने उखुन्हु गठन जूगु नगर कमिटि नगरय् ज्या याइगु जुल लिसें न्हापा याना वया:च्वीपिं पासापित सुभाय् नं बिइगु ज्या जुल ।

कथंह.....

किपू नगरपालिकाया न्हूगु बजेट सार्वजनिकिकरण

ज्वजलपा वा:पौ

वि.सं. २०५३ चैत्र १४ गते पलिस्था जूगु किपू नगर पालिकाया नीतिवःगु (२२औं) नगर परिषद वःचाःगु जानकारी बिइगु नितिं किपूया हिलसाइड होटल्य वंगु पुस २९ गते छगू ज्याभवः याना न्ह्यव्वल ।

किपू नगरपालिकाया न्हूम्ह कार्यकारी अधिकृत उद्धव प्रसाद रिजालया नायोसुइ जूगु उगु मुंज्याया मूपाहाँ भूमिसुधार तथा व्यवस्था राज्यमन्त्री विक्रम बहादुर थापां त्वारवालय् मत च्याका उलेज्या याना दिल । उगु मुंज्याय् काठमाडौं जिल्ला क्षेत्र नं.१० या सभासद राजेन्द्र कुमार के.सी., रुपा महर्जन, विनोद श्रेष्ठ, इच्छा कुमार तामाङ व पुलांम्ह राज्यमन्त्री दिलिप महर्जननं दुगु खः ।

अनुज प्रधानं संचालन याःगु उगु ज्याभवलय् लेखा अधिकृत सानुवावु परियारं लसकुस न्वचु तयादीगु खः ।

किपू नगरपालिकाया कार्यकारी प्रमुख उद्धव प्रसाद रिजालं आ.व. २०७३/७४या निति रु. १७, ७१, ८४,०००/ विनियोजन यानागु कनाःदिल । गुकी चालुतर्फ रु. ७,४७,६३, ०००/ व पूँजीगत पाखे रु.१०,



२४,२१,०००/ न्ह्यव्वया दिल । किपू नगरपालिकाया थःगु छें दयेकेगु निति किनपा वडा नं.३ या कि.नं. २ व ३ या ६४३.८० वर्ग मिटरय् २ करोड ५० लाख खर्च याना छगू तल्ला छें दने धुनागु व वइगु दैयुनं २ करोड धेवा फ्यानागु खं कनादिल ।

वय्कलं सिम भुवाःहिटी खानेपानी मुहान संरक्षण, सम्बर्द्धन व क्षमता अभिवृद्धि यायेत नेपाल खानेपानी व्यवस्थापन बोर्ड रु.११ करोड, २० लाख, काठमाडौं उपत्यका खानेपानी लिमिटेड

पाखें रु. ४ करोड १० लाख व किपू नगरपालिकाया २ करोड याना कुल लागत १७ करोड ३० लाखया योजना न्ह्यव्वया दिल । खानेपानी मुहान संरक्षण, न्हूगु श्रोत पहिचान याना लः मुंकेगु, वितरण प्रणाली सुधार हयेगु नापं किपू नगरपालिकायात दिशामुक्त क्षेत्र घोषणा यायेगु योजना नं कनादिल ।

परिषदया उद्घाटन भूमिसुधार तथा व्यवस्था राज्य मन्त्री विक्रम बहादुर थापां थःगु नुगःखँ तयेगु भवलय् किपू नगर पालिकाया नगर परिषदय् ब्वति

काये दया थःत गर्व महासूस जूगु धयादिसें नगरपालिकाय् फुक्क राजनीतिक दलया प्रतिनिधित्व दुगु जूसा प्रजातान्त्रिक पद्धतिइ विकासया नितिं फलदायी जुइगु विचाः प्वकादिल ।

वय्कलं तःधंगु दल न्ह्याबलें तःधं हे जुया मच्चनीगु, चीधंगु दल न्ह्याबले चीधं हे जुया मच्चनीगु इतिहास नेपालय् दुगु खँ कनादिल । किपू नगर पालिकाय् एमाले, नेपाली कांग्रेस, नेमकिपा व एकीकृत माओवादी, वैद्य माओवादी व विप्लव माओवादी बाहेक मेपिन्त नगर



पालिकाय् प्रतिनिधित्व मयाकूगु खँयात कया वय्कलं अथे अप्रत्यक्ष रुपं नगरपालिकाया बारे आलोचना यानादीगु खयेमाः धकाः अन सहभागीपिन्सं अनुमान यानादीगु खः । मन्त्री थापा स्वयं राष्ट्रिय प्रजातन्त्र पार्टी नेपालपाखें सरकारय् प्रतिनिधित्व याना च्वनादीम्ह खःसा वय्कःया पार्टी तकं किपू नगरपालिकाय् समावेश मज्गुलिं अथे न्ववानादीगु खयेमाः ।

उगु ज्याभवलय् विशेष पाहां क्षेत्र नं. १० या सांसद राजन केसी किपू लागाय् त्वनेगु लःया

समस्या समाधान यायेत सुन्दरी घाटं लः हयाः किपुलिइ इनागुलिइ कर्मचारीतय्गु लापारबाही नं याना दुसित लः इनेगु याःगुलिं अज्वःगु लः बन्द यायेमाःगु खँ न्ह्यथसें नगरपरिषद पारित याःगु नीति तथा कार्यक्रम इमान्दारी पूर्वक कार्यान्वय यात धाःसा किपुलिइ लःया समस्या जुइमखु धयादिल ।

उगु समारोहलय् सांसदनिसें पुलांम्ह राज्य मन्त्री अले थोथी राजनीतिक पार्टीया प्रतिनिधि नाप नापं मेमेपिं ब्यक्तित्वपिन्सं भिंतुना न्वचू बियादीगु खः ।

किपू सांस्कृतिक सम्पदा जगेर्ना व पर्यटन विकासय् नगरपालिकाया भूमिका विषय गोष्ठी



ज्वजलपा वा:पौ

वंगु पुस २९ गते बुधवार किपू नगरपालिकां निगू ज्याभवः न्ह्याकल ।

हिलसाइड होटल किपूलय् सुथय् आ.व.२०७३/०७४ या बजेट सार्वजनिकिकरण व न्हिनय् किपूया सांस्कृतिक सम्पदा जगेर्ना

व पर्यटन विकासय् नगर पालिकाया भूमिका विषय छगू गोष्ठी जुल ।

नगरपालिकाया गवसालय् रमेश महर्जनया संयोजनय् उपप्राध्यापक बज्रमुनि बज्राचार्य कार्यपत्र न्ह्यव्वया दीगु खः । किपू नगरपालिकाया न्हूम्ह

कार्यकारी अधिकृत उद्धव प्रसाद रिजालं त्वारवालय् मत च्याका उलेज्या याना दीगु उगु ज्याभवलय् बज्रमुनी बज्राचार्य कार्यपत्र न्ह्यव्वयेगु भवलय् उगु कार्यपत्रय् किपू डाँडाय् दुगु सांस्कृतिक सम्पदा, बाजागाजा, खः प्याखँ, छः प्याखँया बारे

न्ह्यथनादीगु खः । गुकिं यानाः कार्यपत्रया बारे टिप्पणी यानादीपिं उज्वःसं किपू नगरपालिका धइगु किपू डाँडा जक मखु । थुकी किपू नगर पालिकाया मेमेगु थासय्या छुं हे खँ न्ह्यथना मतः धकाः कुं खिनादीगु खः । थुकिया लिसलय्

किपू नगरपालिका धइगु किपू डाँडा जक मखूगु सहभागीपिनिगु कुंखिना

कार्यपत्र प्रस्तुत कर्ता बज्रमुनी बज्राचार्य थ्व छगू सुरुवात जक खः । थुकी मचाः मगाःगु लिपा भिंका यनेगु जुइ धकाः लिसः बियादील ।

उगु कार्यपत्रय् किपूया म्हसिइका, किपूली दुगु सांस्कृतिक सम्पदा व वर्तमान अवस्थाया बारे नं दुरयंक तसकं बांलाक कुलातःगु दु ।

अथेहे थ्व कार्यपत्र न्ह्यव्वयागुया उद्देश्य कनेगु भवलय् किपूयात सांस्कृतिक नगर दयेका पर्यटकीय गन्तव्य स्थल दयेकेगु, किपूयात खुल्ला संगीत संग्रहालय दयेकेगु, किपूया संस्कृतिनाप स्वापु दुगु पुराण, साहित्य, वंशावलीया अनुसन्धान याना उकिया रिकर्ड दयेका सफू पिकायेमाःगु नापं यक्व सुभावा बियातःगु दु ।

थुकी नगरपालिकां यायेमाःगु ज्याया बारे नं न्ह्यथना तःगु दु । उगु कार्यपत्रया बारे पुलांम्ह मेयर हिराकाजी महर्जन व प्रयाग मान प्रधानं टिप्पणी यानादीगु खः ।

थ्यां न्ह्यः संयोजक रमेश महर्जन किपू नगरपालिकाया ऐतिहासिक पक्षबारे न्ह्यथनादिसें किपू नगर पालिकायात सांस्कृतिक सम्पदा नगर घोषणा यानाः पर्यटन विकासय् तिबः बिइमाःगु धयादिल ।

अथे हे कार्यपत्रय् मगाः मचाःगु बारे थःपिनिगु सुभावा बियादीपिं नजरराम महर्जन, रविन्द्र बहादुर प्रधान, यमुना महर्जन, कर्ण महर्जन, राजेश महर्जन व टिकाराम महर्जन खः ।



-सानुराजा शाक्य-

नेवा: स्वायत्त राज्यया नितिं नेवा:तसें नेपाल सम्वत १९३० पोहेलाथ्व ९ (२६ डिसेम्बर २०१०) खुन्हु रंगशालाय् नेवा:त वृहत रुपं मुना: नेवा: राज्यया घोषणा जूगु दियात नेवा: स्वायत्त राज्य मंका: संघर्ष समितिं नेवा: एकता दिवस धका: हनेगु भवलय् थुगसी नं माघ ४ गते नेवा: एकता दिवस हनेगु क्वछिउगु दु । तर थ्व खुन्हु नेवा: एकता दिवस हनेगुया औचित्यता व आवश्यकताया सवाल्य विवाद अले दिवस हनेगु कि नेवा: प्रदेशया छुं नं माग पूमवंसे संविधान व:गुलिं थुकियात संघर्षया दिं धका: धायेगु धइगुलिइ नेवा:त अलमलय् दु । न्हापांगु संविधानसभाया चुनाव धुंका: पहिचान सहितया प्रदेशत निर्माण यायेगु दवाव तच्चयाच्वंगु इलय् नेवा:तसें नं थ:गु पहिचान सहितया राज्यया स:यात सशक्त याना: संविधानसभायात दवाव विया: संघीयता सहितया संविधान जारी जुइगु अवस्थाय् नेवा: प्रदेश त्वमफियेमा: थुकिइ अधिकांश नेवा:तय् सहमति दु धका: नेवा: राज्य घोषणा उगु दिनय् जूगु ख: ।

नेवा: राज्यया घोषणा जूगु दियात नेवा: स्वायत्त राज्य मंका: संघर्ष समितिं नेवा: एकता दिवस धका: हनेगु परम्परा न्ह्याकूगु ख: । थ्व परम्परा न्ह्याये धुंका: ख्वपय् व यल नेवा:तय् वृहत जनसहभागीताय् एकता दिवस खुन्हु नेवा:तसें वृहत प्रदर्शन मार्फत नेवा: प्रदेशया आकांक्षा

नेवा: एकता दिवस पूमवंगु म्हगस

संविधानसभाया चुनाव धुंका: संविधान जारी जुइगु इलय् तक थ्यनेवं पहिचान सहितया प्रदेशया पक्षधर पार्टी धका: धयावयाच्वंगु पुष्पकमल दाहाल नेतृत्वया एमाओवादीं नं पहिचान सहितया प्रदेशया विरुद्ध न्हयगु प्रदेशय् कांग्रेस एमालेनाप छगू धारणा दयेका संविधान जारी यायेगुलिइ सहमत जुइवं संघर्ष समितिइ सङ्घीय समाजवादीया नेवा: संघ छगू बाहेक राजनीतिक प्रकृतिया फुक्क हे नेवा: संगठनत नेवा: प्रदेशया नितिं संघर्ष वइगु संभावनाया अन्त जुल ।

क्यनेगु अवसर कथं कयावयाच्वंगु दु । नेवा: राज्यया घोषणा धका: धा:सां थुकियात मुर्त रुप संविधानय् हये मफुत ।

नेवा: प्रदेश जक मखुकि आदिवासी जनजातितसें ल्त्वनाच्वंगु पहिचान सहितया प्रदेशया विपक्षय् हे संविधानसभां संविधान जारी यानां त्व:तल । थ्व कथं नेवा: राज्यया घोषणा नेवा:तय् पूमवंगु म्हगसया रुपय् जक खनेदत ।

निक्व:गु संविधानसभा धुंका: नेवा:तसें ल्त्वनाच्वंगु थ्व संघर्षय् लिपांगु पटकय् वया: नेवा:तय् सहभागिताया सवालय् हे न्ह्यस: चिं दन व नेवा: एकता दिवस नं कर्मकाण्डी सिमित जुयावन । संविधान जारी जुइत्यंगु लिपांगु इलय् अर्थात संविधानसभाया निक्व:गु चुनाव धुंका: नेवा: स्वायत्त राज्य मंका: संघर्ष समिति तक संघर्षया गुगु रुप विइगु धइगुलिइ अलमल जुल ।

संघर्ष समितिइ मुंका स्वताजि कथंया संघ संस्थात दुथ्याना मंका: संघर्ष समिति गठन जूगु ख: । दकलय् न्हापां राजनीतिक दलनाप आवद्ध नेवा:तय् राजनीतिक भातृ संगठनत थुकी दुथ्या: व संघर्ष नीति निर्माणय् स्टेरिड र ।जनीतिक दलया नेवा: भातृ संगठनतय् ल्हा: प्रभावशाली

खनेदत । विशेष याना: एमाओवादी पार्टी हे शुरुइ जातीय आधारय् प्रदेशया माग या:गु राजनीतिक पार्टी जूगु व उगु इलय् दकलय् सशक्त पार्टी व सक्रियता नं उकथं हे खनेदुगुलिं राजनीतिक पार्टीया नेवा: भातृ संगठनत मध्ये र ।जनीतिक व परिचालनया दृष्टिं संघर्ष समितिइ नेवा: राष्ट्रिय मुक्ति मोर्चाया सशक्तता यक्व खनेदत ।

मुक्ति मोर्चाया सक्रियता व सशक्तताया कारणं गनं संघर्ष समिति माओवादीया लाइनया संगठन परिचालनया माध्यम जक जुइगु ख:ला धका: मेमेगु राजनीतिक दलया नेवा: संगठनतय् चिन्ता खनेदुगु ख: । राजनीतिक दलया वैधानिक नेवा: संगठनया रुपय् उबलय् एमाओवादीया नेवा: मुक्ति मोर्चा व एमालेया लोकतान्त्रिक नेवा: संघ जक ख: । कांग्रेसया लोकतान्त्रिक नेवा: दबू धा:सां पार्टीया वैधानिक हैसियत प्राप्त मज्जु तर कांग्रेसया नेवा: कार्यकर्तातसें न्ह्याकाच्वंगु संगठन जक जूगुलिं संघर्षय् कांग्रेसया हे सहभागिता कथं काये थाय् मदु । संघर्ष समितिया नीति व कार्यक्रम नाप एमाओवादीया पार्टीगत रुपं हे सामिप्यता अले एमालेया नेवा:

संघ पार्टीया वैधानिक संगठन ख:सां संघर्ष समितिइ नेवा: संघया थ:गु सक्रियता बाहेक पार्टी नीतिगत व संगठनात्मक सहयोग मया: । मेगु राजनीतिक रुपं दुगु नेपा: राष्ट्रिय पार्टीया नेवा: न्ह्यलुवा:या सक्रियता पार्टीया नीतिनाप संघर्ष समितिया मू मागत समन्वय जूगु खनेमदुसां संघर्ष समितिया मू ज्याभवलय् धा:सा पार्टीगत रुपं सहभागीता दुगु ख: ।

थ्व धुंका: नेवा: जातीय खल: पुच:त नं थुगु संघर्ष समितिइ दु । विशेष याना: राजनीतिक मुद्दायात जनस्तरं साथ बिइगु नितिं नेवा: जनताया सहभागीता अप्वयेकेगु माध्यमया रुपय् नेवा: जातीय खल: पुच:तसें मू भूमिका म्हितल ।

नेवा: दुने तुलनात्मक रुपं थ:गु जातीय समुदायया मास परिचालनय् भूमिका दुपिं यलया ज्यापु समाज, ज्यापु महागुथि व खड्गी समाज नं थुगु संघर्ष समितिइ दुथ्या:केमा:गु व दुथ्या:गु कारण ख: । व धुंका: नेवा:तय् हकहित व भाषिक अधिकारया नितिं सक्रिय संस्थात नं संघर्ष समिति दुथ्याना: नेवा: पहिचानया सवालयात प्रवाहीकरण यायेगु कथं थुज्व:गु संस्थायात नं संघर्ष समिति दुथ्या:गु ख: । थुज्व:गु संस्थात नेवा: देय् दबू, नेवा:

जागरण मञ्च, नेवा: देय् गुथी नेपाल मण्डल ख: ।

न्हापांगु संविधानसभा पहिचान सहितया प्रदेशत दयेके फइगु अनुकूलतायात न्हंकेत आखिरय् पहिचानया नामय् त:त:धंगु राजनीतिक दलया एकल प्रभुत्ववादी नेतातय् षडयन्त्रयात पहिचान सहितया राज्यया पक्षधरतसें गने मफुसेलि न्हापांगु संविधानसभा विघटन सफल जुल ।

न्हापांगु संविधानसभाया विघटनया लिसं पहिचानपक्षधर तय् सशक्त मूल प्रवाहया र ।जनीतिक दलया विकास मज्जुनिगु अले पहिचान सहितया राज्य धइगु जातीय राज्य ख: धइगु पहिचान विरोधीतय् भ्रमं व्यापकता कया: जातीय राज्यया कारणं देसय् द्वन्द्व ब्वलनेफु धइगु भ्रमय् स्वयम् पहिचान, पहुँच व प्रतिनिधित्वया नितिं संघर्षरत नेवा: लगायत आदिवासी जनजाति समुदायत लाना: सचेत जुइ मफुसेलिं निक्व:गु संविधानसभाया चुनावया लिच्व: पहिचान पक्षधर समुदायया आकांक्षा विपरीत पिहांवल ।

लिपांगु संविधानसभाया चुनाव न्ह्य: एमाओवादी कुचा: दले वं उकिया प्रभाव एमाओवादीया नेवा: संगठनय् नं

लात व नेवा: मुक्ति मोर्चा नं कुचा: दला छगू संविधानसभाया चुनावय् ब्व:ति काइगु मेगु संविधानसभाया चुनाव बहिष्कार याइगु पुच: कथं पिलुत । तर निगुलिं संगठनत धा:सा संघर्ष समितिइ दुथ्यावल ।

मेखे एमालेय् नं पहिचान पक्षधर नेता कार्यकर्तातसें पार्टी परित्याग याना: सङ्घीय समाजवादी पार्टी गठन यायेधुंका: संघर्ष समितिइ वयाच्वंगु नेवा: संघया अधिकांश नेता कार्यकर्तात नं सङ्घीय समाजवादी वनेवं सङ्घीय समाजवादीया नेवा: संगठन सङ्घीय समाजवादी नेवा: संघ संघर्ष समिति दुथ्यात मेखे एमाले पहिचान सहितया प्रदेशया विरुद्ध पार्टी हे जेहाद न्ह्याकेवं एमालेया आदिवासी जनजाति व मधेसी संगठनया औचित्यता तक खनेमदया वनेवं एमालेया नेवा: संघया प्रतिनिधित्व संघर्ष समितिइ यक्व ई तक जुइमफुत ।

संविधानसभाया चुनाव धुंका: संविधान जारी जुइगु इलय् तक थ्यनेवं पहिचान सहितया प्रदेशया पक्षधर पार्टी धका: धयावयाच्वंगु पुष्पकमल दाहाल नेतृत्वया एमाओवादीं नं पहिचान सहितया प्रदेशया विरुद्ध न्हयगु प्रदेशय् कांग्रेस एमालेनाप छगू धारणा दयेका संविधान जारी यायेगुलिइ सहमत जुइवं संघर्ष समितिइ सङ्घीय समाजवादीया नेवा: संघ छगू बाहेक राजनीतिक प्रकृतिया फुक्क हे नेवा: संगठनत नेवा: प्रदेशया नितिं संघर्ष वइगु संभावनाया अन्त जुल ।

मेखे संविधानसभाया चुनाव बहिष्कार या:गु वैद्य माओवादीया संघीयताया अवधारणा हे स्पष्ट मज्जुगुलिं संघर्ष समितिइ दुथ्या:गु वैद्य माओवादीया नेवा: मुक्ति मोर्चा नं निष्क्रिय धइथें जुल ।

ब्वनेकुथि यौन शिक्षा गुलि आवश्यक ?

नेपा: गांया गां दुगु अशिक्षित वर्ग आपा दुगु देय् ख:सा थनया सामाजिक व सांस्कृतिक संरचनाया कारणं नं थन यौनया विषयलय् खुलस्त जुया खँ ल्हाये फइगु अवस्था आ:तक नं मदु । मस्तय् थ:म्हं मस्युगु खँत सयेके सिइके यायेगु थाय् मदु । अथे जूगुलिं मस्तयत् स्कूलय् हे यौन शिक्षा बिइमा: धइगु खँ वयाच्वंगु दु ।

यौन छगू प्राकृतिक नियम ख: । थ्व सकसिया नितिं हे आवश्यक खँ ख: । तर नं थुकिया विषयलय् जांया म्होतिं थीथी कथंया समस्या ब्वलने फु । अथे जूगुलिं यौनजन्य समस्यापाखें बचय् जुइगु नितिं यौन शिक्षा आवश्य जू धाइपिनिगु पुच: नं थन मदुगु मखु ।

सरकारं कक्षा ८ निसें यौनशिक्षा बिइगु छुं कुत: या:गु ख:सां उकी यौनयात शरीर विज्ञानया छगू ब्वया रुपय् जक कयात:गु दु । मस्तयगु नुगलय् बुयाव:गु यौन जिज्ञासा, शरीरय् वयाच्वंगु ह्यूपा:, इमित वयेफूगु यौनजन्य समस्याया समाधान गुकथं यायेगु धइगु थौं हाथ्याया रुपय् वयाच्वंगु दु ।

उकें हे उमिसं मस्युगु कारणं अज्ञानतावश मखुगु लँपु ज्वनिगु नं उतिकं हे सम्भावना दु । थुज्व:गु अवस्थाय् स्कूल निसें हे यौन शिक्षा तयेगु खँ जोडतोडं जुयाच्वंगु दु ।

नेपा:थें ज्या:गु यौनया खँ ल्हायेत तक प्रतिबन्ध थें जुयाच्वंगु समाजय् स्कूलय् हे यौनशिक्षा तयेगु खँ छगू चुनौतिया रुपय् वयाच्वंगु दु । नेपा:या शहरी क्षेत्रया लागि यौनशिक्षा सामान्य आवश्यकताया रुपय् खनेदुसां नं गामय् धा:सा थुकिं मेकथं हे लिच्व: लाकिगु ग्या:चिकु नं दयाच्वंगु दु ।

गुलिखे मनूतसें ला स्कूलय् यौनशिक्षा तयाविल धा:सा थुकिं याना: नेपा:सा सामाजिक संरचनाय् हे धा: लाइ धइगु विचा: तयेगु या: । गुलिखे मनूतसें धा:सा मचाबलयिनसें हे उमिगु ध्यान यौनपाखे सालेगु यात धा:सा थुकिं याना: अनैतिक यौन सम्बन्ध तयेगुलिइ ग्वाहालि जुइगु तक धायेगु या: । उथें थन एड्स रोग व कण्डमया विज्ञापनय् यौन सम्बन्ध त:सां ज्यू तर कण्डमया प्रयोग अनिवार्य यायेमा: धयात:गुलिं नं थुज्व:गु सम्बन्ध तयेगु प्रवृत्ति अप्वयाच्वंगु दु ।

स्कूलय् यौन शिक्षा बिइगु धइगु हे विकृतिया विज्ञापन यायेगु ख: धाईपिं नं दु । उज्व:पिन्सं मस्तयत् यौन शिक्षा बिइगु स्वया: नं उमित बांला:गु जीवन शैलीया बारे ज्ञान बिइमा: धइगु धापू तयेगु या: ।

तर आपा बुद्धिजीविपनिगु धारणा धा:सा स्कूलय् यौन शिक्षा बिइमा: धइगु दु । उमिसं स्कूलया मस्तयत् यौन शिक्षा बिइगु यात प्रतिबन्ध तयेमज्यू तर उमित बिइगु शिक्षाया सामग्री धा:सा सन्तुलित जुइमा:गु धापू तयेगु या: ।

नेपालय् म्होचा इलय् हे यौन सम्पर्क तयेगु बानीया विकास जुयाच्वंगु दु धा:सा म्होचा उमेरय् हे मां जुइगु प्रवृत्ति नं दयातुं च्वंगु दु । उथें हे एच. आइ. भी /एड्स थें ज्या:गु ग्यानापुगु त्वय्या विगविगि नं दयाच्वंगु दु ।

थुज्व:गु अवस्थाय् मस्तयत् इलय् हे थुकिया बारे बांलाक्क ज्ञान मबिइगु ख: धइगु जूसा उपिं उज्व:गु लँपुइ नं वनेगु गुकिया अन्त्य धइगु तसकं दु:खद् जक हे जुइ ।

थीथी यौन रोग बारे सचेत यायेगु लागि व उमिगु शरीरय् वयाच्वंगु स्वाभाविक ह्यूपा: छुछु ख: व अस्वाभाविक ह्यूपा: गुकथंया जुइ, सुरक्षित यौनसम्पर्क धइगु छु ख:, असुरक्षित सम्पर्क जुल धा:सा गुज्व:गु लिच्व: वयेफु धइगु खँ बांलाक थुइकेगु लागि नं स्कूलय् बांलाक यौन शिक्षा बिइमा:गु खनेदयाव:गु दु ।

साहित्य/चिनाखं

कीर्ति

नाति महर्जन

छ:चपा, पाँगा

सुंमदु सहारा बुराबुरीपिनि थ्व जगते
थ:थिति ग्वा:ग्वा:द:सां
कायम्ट्याय् दाजु किजा द:सां
जिवं फतले,
कमाई दतले
यो दाइ भाइ धका: ग्वा:ग्वा: वइगु
भ्वय् नयेथें न्हियान्हिथं नया:वनीगु।
जिवं मफुबले, कमाई मदुबले
खँसां मखँसु याना वनीगु
खनीथें सुला सुला जुइगु
संपत्ति दतले नके त्वंके फतले
सकसिनं माने या:वैगु
त्वालय् सुनां ख्यायमफुगु
संपत्ति मदुबले नके त्वंके मफुबले
स:तूसां मता:सु याना वनीगु
तोल बलं हे हेपे याइगु
सकलें फ: फ: स्वया वनीगु।

गजा:गु स्वार्थी समाज भीगु
नये दुथाय् दे दुपिनिगु
न्ह्याक गुण याना: त:सां मस्यु
थ:कतिलातकि गा:गु
संपत्ति काये मधुंतले
धुकु खालि मजूतले
सास:पतिं यो वा, यो मां धका: हेका तैगु
चाकुमही फलफुल पो पो बी हैगु
संपत्ति काये धुँबले
धुकू खालि याये धुँबले
थाकु चाल बुरा बुरीया न्ह्योने वय्गु

जा छपे इलय् नकेगु
सुथे बहनि नके त्वंके यायेगु
नसैं मनसैं ब्वलंकात:पिं मां बौ
थौं काय म्ट्याययात हे बोभू जूगु
इमिसं याना त:गु गुण हरे शिव
गुलि याकनं ल्वमंगु।

तिसा ल्हातये मला:तले संद:खालि मजूतले
म्ट्यायपिं नं न्हिं भिधू वैगु
सासा भिभिंगु हया: नके हैगु
तिसा ल्हाते ला:बले
संद: खालि जूबले
लोमन मां बौया ख्वा: स्व: वयेगु
तोतल नखतिया न: वयेगु
गुलिजक स्वार्थी समाज भीगु
लोभि पापीतसैं हे जा:गु
बुरा बुरी नकेम्वा:क संपत्ति जक कया
थ:पिं जक कतिलाके दयेवं गा:गु।

काय म्ट्याय मचाबले
बुरा बुरीया कमाई दुबले
धा:धा:गु नका: ब्वलंका त:गु
दुरुं न्वसीका त:गु
थौं इपिं बुरा जूबले कमाई मदुबले
सुनां छछा नके हे थाकु चा:गु
थ:पिनि मय:गु नकूसां गा:गु
मखु घ्य: व जा नये धा:गु।

नसैं मन:सैं काय म्ट्याय् ब्वलंका त:गु
लुमंके मा: गुण मां बौ पिनिगु
भीत ब्वलंकेत दु:ख सिया जुयाला
थौं इपिं धुसि धुसि लुया जुइमा:गु
थजा:पिं मां बौ पिनिगु
गुलि याकनं माया त्वते फूगु
बुरा बुरी जुइबले सहारा दैला धैगु आसं
भीत जन्म बिया त:गु।
न्यादँ खुदँ मदुतले स्कुल वने मफुतले

न्हिं न्हिं बुया म्हितका जुइगु
धा:धा:गु न्ह्यव: हया बिइगु
न्यादँ खुदँ दुबले
स्कुल वने फुवले
स्कुल थ्योक त:वने का:वने याइगु
छैं थ्यंक लुकुं छिना: हैगु
हाछिका वइबले
कपा भचा क्वाइबले
डाक्टर वैद्य क्यं जुइगु
नुग: मछिंका: ख्वया जुइगु
न्ह्य:मवइबले वाचा वाचा तक इले
क्वा: बाखँ कना थ्यना तइगु
न्ह्य: मव:तले धुपेना तइगु
थौं गुलि याकनं भी लोमंगु
थुलि याकनं लोमनि मता:गु।

गुलि जक माया ममता बिया
भी मां बौपिन्सं बोलंका त:गु
इमिगु माया ममता या बदला
गोगु जन्म बिका भीसँ पुलेगु
बुरा बुरी जुइबले
सने मफौबले
काय म्ट्याय न्ह्योने मा:गु
सेवा याइ धैगु आसा जुइगु
काय म्ट्याय न्ह्योने मदैबले
इमि नुग: स्याइ अले
सह याये मफया ख्वइगु
काय म्ट्याय जक लुमका च्वनीगु
नुग: ख्वयेके मज्यू बुरा बुरीतय्गु
फुथें चा:थें सेवा याना तयेगु
बुरा बुरी मां बौया सेवा याना
इमिगु आशिर्वाद फयेगु
धन्य मनमोहन छं छगू कीर्ति तयावन
बुद्धा भत्ताया तुतामं चुइका सहारा बियावन
वहे बुद्धा भत्ताया सहारा दया इपिं गौं
निदँ प्यदँसां लिसा कया म्वाना च्वने खन॥

व्यवहारिक जीवन न्ह्याकेत मदयेकं मगा:गु शिक्षा

नास: (न्वचू, उद्घोष व एफ एम संचालन कला)

समाचार

अथे सरोकारवालाया स:
हे न्येके फत धा:सा अभ अण्व:
मनूतय्सं समाचारात विश्वसा
याइ।

रेडियो समाचार
बुलेटिनया डिजाइन

- १) समाचार धुन
- २) समाचाराया वाचकया नां,
- स्टेशनया नां, ई
- ३) सामाचारया मूखू खँ
- ४) विज्ञापन
- ५) समचार
- ६) स्वापू धुन
- ७) समाचार
- ८) हाकनं छक: मू मू खँ नापं
- क्वचायेकेगु

समाचारया दथुइ छगू
विषयया सकलसिगु चासोया
खँयात कया छगू हे न्ह्यस:
तया यक्वसिगु लिस: कया

जनआवाज धका: प्रशारण
यायेफइ। जनआवाज धइगु
रेकर्ड याना जक जुइ। जन
आवाज कायेबलय् मिसा मिजं,
मचानिसैं ज्याथ: ज्याथीपिन्ति नं
दुथ्याकेगु खँय् ध्यान तयेमा:।

अन्तर्वार्ता

निम्हेसिया दथुइ छुं उद्देश्य
तया खँभाय् ल्हाइगु अर्थात
न्यनेकने यानागु धइगु हे
अन्तर्वार्ता ख:। गबलें गबलें
छम्हेसित छम्हसिबें अण्व:सि नं
न्यस: तयेफु। अन्तर्वार्ता
सामान्यतया स्वंगू कथंया दु।
१) तथ्य, अनुभुति व विचार
सार्वजनिक याइगु अन्तर्वार्ता, २)
विश्लेषणात्मक अन्तर्वार्ता व ३)
भावुक अन्तर्वार्ता

१) तथ्य, अनुभुति व
विचार सार्वजनिक
याइगु अन्तर्वार्ता

न्यनामिपिन्सं चासो
तयाच्वंगु तथ्य, सरोकार
वालायाया अनुभुति व विचा:
सार्वजनिक यायेगु अन्तर्वार्ता
छगू कथं घटनाप्रधान
जुयाच्वनी।

समाचारया दथुइ हे काइगु
अन्तर्वार्ता हे तथ्य, अनुभुति व
विचार सार्वजनिक याइगु
अन्तर्वार्ता ख:।

२) विश्लेषणात्मक
अन्तर्वार्ता

छुं नं तथ्य, अनुभुति,
अभिष्ट व चिारयात कया
ब्वलनीगु विवाद बाय् सार्वजनिक
रुपं ब्वलनीगु न्ह्यस:यात कया
काइगु अन्तर्वार्ता हे
विश्लेषणात्मक अन्तर्वार्ता ख:।

३) भावुक अन्तर्वार्ता

सुं नं मनूखं सकलसिगु
चासोया विषय जुइक अनुभुति


यानादीगु, त:धंगु छाप त्व:तूगु
विषयसं काइगु अन्तर्वार्ता हे
भावुक अन्तर्वार्ता ख:।

अन्तर्वार्ता काये न्ह्य: हे
अन्तर्वार्ता बिइम्हपाखें छु
कायेगु? अन्तर्वार्ता बिइम्ह मनू
व खँ बिइ फुम्ह ख: ला कि मखु
? धइगु खँयात ध्यानय् तयेमा:।
अन्तर्वार्ता बिइम्ह मनूया
बारे जक मखु अन्तर्वार्ताया
विषयया बारे नं थ:के ज्ञान
दयेमा:।

उलि जक याना
मगा:। अन्तर्वार्ता बिइम्हलिसे
औपचारिक रुपं खँ ल्हाना उम्ह
मनूखं न्ववाइगु पह:निसैं वय्क:या
दृष्टिकोणया विषय नं
थुइकमा:।

अन्तर्वार्ता कायेगु इलय्
ध्यान बिइमा:गु खँ

१) न्ह्यस: चीहाक: तर
प्रस्त जुइमा:।



२) छक: न्यनेबलय् छगू
जक न्ह्यस: जुइमा:।

३) ख: मखु धका: न्ह्यस:
न्यने मजिउ।

४) छक: न्यना लिस: वये
धुंकूगु हे लिस: वीगु कथंया खँ
न्यने मजिउ

५) अनतर्वार्ता बिइम्हेसित
प्रतिपक्ष अर्थात विपक्ष तायेके
मजिउ।

६) अँ, हजुर, ख: ख:, थें
जा:गु थेंजा:गु खँगव: छयले
मजिउ, छयं जक संकेमा:।

७) आक्रमक जुइ मजिउ
८) जनता न्यनामिपिं नाप

स्वाका न्ह्यस: न्यनेगु
९) हाउभाउयात ध्यान

बिइगु

सांगीतिक ज्याभ्व:

रेडियोया अण्व:याना
ज्याभ्व: सांगीतिक जुयाच्वंगु
दु। सांगीतिक ज्याभ्वलं



श्रीकृष्ण महर्जन

अण्व:याना मनोरंजन बिइ।
उकिं न्ह्याइपुकेगु निरति धका:
सांगीतिक ज्याभ्व:यात
काइ।

सांगीतिक ज्याभ्वलय्
गज्व:गु सांगीत अले व
ज्याभ्वलय् थ्यंकीगु मैय् नं
बिइगु सन्देश छु ख: धका: नं
ज्याभ्व: न्ह्याकीम्हेसिनं ध्यान
बिइमा:। थ:म्हं न्ह्याकागु
ज्याभ्व:या आज्जु नाप प्रशार
ण यायेत्यनागु म्यैया छु स्वापू
दु? धइगु खँयात ध्यान
बिइमा:।

छुं नं ज्याभ्व:
न्ह्याकेबलय् गथे थ:गु
सृजनायात ध्यान तयेमा: अथे
हे सांगीत ज्याभ्व:
न्ह्याकेबलय् नं न्यनामियात
ध्यान तयेमा:।
कथंहं.....

इतुंबहालय् नेवा: प्रदेशय् आदिवासी जनजाति जागरण अभियान



नेवा: प्रदेशय् आदिवासी जनजाति जागरण अभियानया इनापय् दी शाक्य फाउण्डेसन नेपाल व केशचन्द्र महाविहार संरक्षण समाजया मंका: खसालय् शनिवा: येँया इतुंबहाय् न्हूगु संविधानय् आदिवासी जनजातिया सरोकारयात कया अन्तर्क्रिया ज्याभ्व: जुल ।

उगु ज्याभ्वलय् मूपाहां अधिवक्ता शंकर लिम्बु जारी जूगु संविधानं नेपा: नापं आदिवासी जनजातियात निगूगु दर्जा अले खस आर्ययात न्हापांगु दर्जा नापं दलितयात स्वंगूगु दर्जा दयेका विउगु दु धयादिल । ज्याभ्वलय् मेम्ह अधिवक्ता रामहरी श्रेष्ठ संविधानपाखें नेवा: नापं उत्पीडित समुदाययात विभेद यात धका: धयादिल । नेवा: प्रदेशय् आदिवासी जनजाति जागरण अभियानया अभियान्ता श्रीकृष्ण महर्जनं न्हूगु संविधानं नेवा:तय्त त:धंगु विभेद या:गु दु धयादिसें आ:या अवस्थाय् आदिवासी जनजाति नापं उत्पीडित समुदाय थ:पनिगु अधिकारया नितिं न्ह्या: वनेगु भ्वलय् अभियान न्ह्याकागू ख: धयादिल ।

हाइकु बारे जानकारी

भाषा अनुवाद ज्ञानवहादुर महर्जन नेवा:

हाइकु म्होजक आख:लं यक्व भाव पिब्वेगु कथंया मू विशेषता दूगु हाइकु जापानी शैलिया चिनाखँ ख: । पूर्वी एसियाली साहित्यय् हलिं साहित्ययात च्छयेवह:गु योगदानया कथं हाइकु व सजोयात कायेगु याई ।

न्हयेगु-च्यागु सदिपाखे हाइकाइ श्रृंखलाया च्वन्त्यागु रुप ख: हाइकु । तत्कालीन हाइकाइ श्रृंखलाया न्हापांगु स्वंगु ध्व: तकया गुकियात होक्कु धायेगु याई । थौ हाइकुया रुपय् च्वन्त्याव:गु दु । हाइकु पूर्ण रुपं शास्त्रिय संरचनाय् चिनात:गु जुइ । न्हापांगु ध्व:लय् न्याग: आख:ख: व, निगुगु ध्व:लय् न्हयेग: आख:ख: व स्वंगुगु ध्व: अर्थात लिपांगु ध्व:लय् न्याग: आख:ख: यानां मुक्कं फिन्हयेग:(१७ ख:) आख:या जुइ हाइकु । तर शास्त्रिय संरचनां जकनं पर्याप्त मजू । कलात्मक ढंग प्राकृतिक किगोया छ्यलाबुला यानात:गु जुइ । हाइकु स्याचुगु व भ्यातुगु (ओजिलो व बोभिलो) जुइमा: । ५-७-५ या संरचना दुने शब्दजाल ग्वया:त:सां उकियात हाइकुया दर्जाय् मतयेफु । थ्व हाइकुया थाकुगु मान्यता ख: व शास्त्रिय चरित्र नं । खुगुगु सदिंया लिपांगु ईलय् व न्हयेगुगु सदिंया न्हापांगुया खँ ख: । उबलय् चीनया बौद्ध धर्मया प्रभाव ला:गुलिं थ्व धर्मय् त:धंगु प्रभाव व प्रतिष्ठा लाके फुगु ख: । बौद्ध धर्मावलम्बितय् थ: गुरुया उजंकथं प्यखेरं न्यनांवना च्वंगु गुम्बाया चित्र दयेकाच्वंगु दु । निभा:ज:, किच:, सिमा क्वय, पालूथाय्, डाँडाया क्वय, ल्वहँया दथुइ, फुक्क थासय् वनां ध्यानीपिनि दथुइ धेँ बल्ला कथं चित्र मदुगु चित्रकला हे न्हाप लाइगु ख: । व किपा:तय् छम्ह भिक्षु डाँडा च्वय् खसुंभुनां च्वंथाय् च्वनां विचा: मन दु । उकिहे गुम्बाया स्वरुप पिब्वई । कल्पनाय् भिक्षु गुम्बा स्वयाच्वनी । भीसं गुम्बा खनेदैमखु तर भिक्षु जक खनी । गुम्हसं गुम्बा स्वयाच्वंगु दै वास्तवय् हाइकुया आत्मा वहे सम्भावनाया प्वांगुपन ख: । थुकथं बौद्ध धर्म व द्वलंढ: दैनिसंया कवि, कलाकारतय्त प्रभाव लाका:व:गु ताओवादया मंका: प्रभाव पाखें

हाइकुया धारणा जन्म जूगु ख: । रुपचाहिं जापानय् वनां अनेकौं ट्यूपा: जुइधुकालि लिपा तयार जुल । उकिं हाइकु थुइकेया लागिं थुकिया पृष्ठभूमि थुइके नितान्त जरूरी दु ।

न्हयेगुगु सदिं न्ह्यासानिसं श्रृंखलाबद्ध हाइकाइ च्वयेगु क्रम छसिकथं म्हो जुजुं वया: आ:या इलय् ५-७-५ संरचना जकया होक्कु तक व:गु जुल । गुलि कविपिन्सं छ्यलाबुलाय् फिन्हयेग:(१७ ख:) आख:या संरचनाय् जक च्वयेगु यात । थथे ५-७-५ संरचनाया जक छ्यला: होक्कु च्वयेगु चलन खनेदुगु ख: । (नेपाली वा नेपालभाषाया होक्कु वा हाइकु च्वयेगु भ्वलय् बाग:आख: वा तुति पाला:त:गु आख:यात धा:सा गणना याइमखु ।) तर उबलेया शैलि अस्पष्टताया कारणं होक्कु उलि थाय्काये मफुत । हाइकाइयात तर्क ब्यंग्यात्मक प्रस्तुतिया प्राथमिकता वियाच्वंगु इलय् नविन प्रयोग जूगु ख:सां तर्कनं ब्यंग्यात्मकताया अवस्थाय् बिते जुल । तर ईया गति व मानसिक परि वर्तनया नापनापं थ्व शैलि नं स्पष्ट अभिव्यक्ति व चिनाखँया सवा: विइगु ज्या जुल ।

आकिन्दा मोरिटाके (१४५२-१५४०) सं न्हापांगु पटक हाइकाइयात होक्कु अर्थात हाइकुया रुपान्तरण यायेत सफल जुल । थुबले फिन्हयेग:(१७ ख:) आख:या संरचनायात हाइकु धायेगु याइमखु । होक्कु जक धाइगु ख: । हाइकु नामाकरण जूगु यक्को लिपा जक ख: । आकिन्दा मोरिटाके च्व:गु हाइकु थथे दु ।

नेपाली भाषा- नेपालभाषां अनुवाद -

भरेको फुल
कुतुंवंगु स्वाँ
हाँगामा फर्कन्छ की
माँय् लिहँवैला धका:
हेर पुतली ।
स्व न्हाँ लापाचा ।

हाइकु वा होक्कु नेपालय् दकलय् न्हापां वि.सं. २०१९ सालय् शंकर लामिछाने जुं रुपरेखा पत्रिकाय् हाइकु पियनां दिइगु ख: ।

बिचा: हायेका

बुदिं : नेपाल
संवत् १०४६
मंसिर अष्टमी



मदुम्ह सूर्जमाया महर्जन

मदुगु : नेपाल
संवत् ११३६
पोहेलाथ्व पञ्चमी



ज्यापु महागुथि किपू नगर समितिया जिवंकाछि ज:
पांगा दथलया नरेशमान डंगोल व ज:पिं अशोक डंगोल,
वरुण डंगोलया मां **सूर्जमाया महर्जन** वंगु नेपाल संवत्
११३६ पोहेलाथ्व पञ्चमि (पुष ३० गते) बिहिवा: ९०
दैय् मदुगुलिं मदुम्हसिया चीर शान्तिया कामनायासं
सुखावती भुवनय् वास लायेमा: नापं मदुम्हसिया
छँज:पिन्सं नुग: चिइ फयेमा: धका: बिचा: हायेकाच्वना ।

ज्यापु महागुथि
किपू नगर समिति, किपू

तपाईंको टोलमा भएका घटना कीर्तिपुरको समाचार बनाउने
हो भने तपाईं एक कल फोन गर्नुस् हामी तपाईंको टोलको
समाचार कीर्तिपुरको समाचार बनाईदिनेछौं

कीर्तिपुरको
चित्रण



किपुलिं पिदनाच्वंगु कीर्तिपुर सन्देश वा:पौ व ज्वज्वलपा: वा:पौया ग्राहक जुइगु नितिं स्वापू तयादिसँ

कार्यालय: निखासी टोल: कीर्तिपुर नपा-३
फोन नं.: ४३३३००७, ९८४१४०१०७७

ज्वजलपा वा:पतिइ छिगू चिनाखँ/बाखं/हाइकु विज्ञापन
व मेमेगु च्वसू पिथनेगु जूसा जिमित स्वापू तयादिसँ

सकलसिगु मंका: स:



ज्वज्वला वाइयो

ज्याकू: निखासी त्वा: किपू नपा-३ फोन ल्या: ४३३३००७,
९८०८६२६४२० ई-मेल : kirtipur_sandesh@live.com